



BILTEN

OPĆINE SREBRENİK



CERTIFIKAT ISO 9001:2000
BROJ: 155865



IZDAJE: OPĆINA SREBRENİK • BROJ: 36 • MJESEC: NOVEMBAR/STUDENI 2011. • BILTEN JE BESPLATAN • TIRAŽ 500



Foto: Svjetlan Bešić

SADRŽAJ

- 2 Obilježene 19. godišnjice 212. brdske brigade
- 3 32. sjednica OV-a Srebrenik
- 4 33. i 34. sjednica OV-a Srebrenik
- 5 Ugovori sa OCD-om; Nermin Tursić na Danima Bošnjaka Kosova
- 6 Otvorena suvenirnica u Srebreniku i novi most na Gradini
- 7 Asfaltiranje puteva u Babunovićima i Špionici C.
- 8 Otvoren OGUS 2011
- 9 Održano Veče saza; Djeca crtaju i pjevaju gradu
- 10 Održan festival „Zvuci starog grada“; Ljetna noć u Srebreniku
- 11 Održan koncert Balsike; Održan rok koncert GBK
- 12 Vinkovačko veče; Smotrom folklora završen OGUS 2011
- 13 Održani Dani kruha i Mala seoska olimpijada
- 14 Promocije knjige „Riječi“; Uspjeh naših na Danima evropskog naslijeđa
- 15 Održani Dani polja; Posjeta ministra poljoprivrede Jerka Ivankovića-Lijanovića
- 16 Održan sajam pčelarstva; Održana združena pokazna vježba
- 17 Otvorena nova džamija u Čehajama
- 18 Ramazanski bajram u Srebreniku
- 19 Hercegovih 10 godina izvoza u EU; Otvoren novi rudnik krečnjaka u Bjelavama
- 20 Uspjeh Samire Smajlović; Donacija namještaja OŠ Duboki Potok
- 21 Nova kuća Džanić Ademu; Podjela poklon paketa
- 22 Odlomci iz neobjavljenog romana Omča
- 23 Sportske novosti
- 24 Sportske novosti



Detalj sa obilježavanja 19. godišnjice 212. brdske brigade

U Srebreniku obilježena 19. godišnjica 212. brdske brigade

U organizaciji Općinske službe za boračko-invalidsku zaštitu i srebreničkih boračkih udruženja, početkom septembra 2011. godine, na gradskom šetalištu u Srebreniku, održana je prigodna svečanost, kojom je obilježena 19. godišnjica formiranja 212. brdske brigade Srebrenik. Uspomene na ratni put ove brigade evocirao je njen ratni komandant Abdurahman Fazlić, naglasivši da je 212. brigada u toku agresije na BiH bila uvijek tamo gdje su ratišta bila najvruća. –„Odmah nakon formiranja, početkom septembra 1992. godine borci ove brigade dobili su svoju stalnu zonu odgovornosti na linijama odbrane u Gradačcu, Brčkom i Čeliću, a učestovali su i u oslobodilačkim akcijama na brojnim ratištima širom BiH. Za nepune četiri godine kroz ovu jedinicu prošlo je oko 7.000 boraca, od kojih je njih preko 200 dalo svoje živote za odbranu BiH“, istakao je Fazlić, naglasivši da su za nesebičnu hrabrost 4 pripadnika ove jedinice nagrađena i najvišim ratnim priznanjem „Zlatnim ljiljanom“. Nakon pri-



Abdurahman Fazlić: Kroz ovu jedinicu je prošlo oko 7.000 boraca

godnog referata, učenjem fatihe i polaganjem cvijeća na centralno šehidsko spomen-obilježje, delegacije Općine Srebrenik i srebreničkih boračkih udruženja odale su počast šehidima i poginulim borcima u proteklom ratu u BiH.



Delegacije Općine Srebrenik i srebreničkih boračkih udruženja su odale počast šehidima

Izvještaj sa 32. sjednice OV-a Srebrenik

Najveću raspravu na 32. sjednici Općinskog vijeća Srebrenik, koja je održana 12.07.2011. godine, izazvala je Informacija o radu Općinskog suda u Gradačcu. Vijećnici su posebne primjedbe imali što se u dva navrata predsjednica Suda nije pojavila na prethodnim sjednicama, zbog čega se o ovoj tački raspravljalo tek na ovoj sjednici. Najveće primjedbe su upućene na sporo rješavanje predmeta, posebno iz imovinsko-pravne oblasti, zbog čega najviše trpe privredni subjekti, pa je upućen apel da se predmeti iz ovoga dijela rješavaju po hitnom postupku, kako privrednici ne bi trpjeli s poslom. Predsjednica Suda je to pravdala velikim brojem predmeta te malim brojem sudija koji rade na ovim poslovima, jer ovaj Sud trenutno opslužuje dvije općine (Srebrenik i Gradačac) sa blizu 100.000 stanovnika. Iz tog razloga donesen je zaključak da se krene u proceduru vraćanja Općinskog suda u Srebrenik, jer trenutno funkcionisanje ove institucije znatno usporava rad privrednika a veliki su problemi koje trpe i ostali građani općine Srebrenik. Višemjesečno odlaganje imenovanja novog Upravnog odbora JZU „Dom zdravlja“ Srebrenik, konačno je okončano na ovoj sjednici OV Srebrenik, gdje je za predsjednika UO imenovan Dževad Brašnjić iz reda osnivača, te doktori Ediba Avdić iz reda uposlenika i Zerem Enver ispred Ministarstva zdravstva TK. Iako je SDP tražio da se ova



Svjetlan Bešić-novi općinski vijećnik

tačka skine s dnevnog reda, te da se još jednom izvrše konsultacije sa Ministarstvom zdravstva TK, ipak to se nije dogodilo pa je na glasanju spomenuti Upravni odbor dobio podršku vijećnika. Vijećnici su također prihvatili da se izvođaču radova na pješačkoj zoni, firmi „ITK Musić“ d.o.o. Srebrenik priznaju naknadni i nepredviđeni radovi, ali ne u visini njihovog zahtjeva nego u visini od 72.438 KM. Takođe je prihvaćeno da Općina isplati dug MZ Podorašje firmi „Elektro EM“ iz Brčkog u visini od 8.000 KM za izgradnju javne rasvjete u tom naselju. Na ovoj sjednici raspravljalo se i o informaciji o položaju izbjeglih i raseljenih lica, gdje je naglašeno da se pokuša rekonstruisati put prema izbjegličkom kampu

Pušine iznad Tinje, te da se poprave higijenski uslovi izbjeglicama koje su smještene u OŠ „Tinja“. Usvojena je i informacija o stanju kulture, gdje je istaknuto da nosilac kulturnog razvoja treba da bude KUD „Mehmed Ibrahimović“ kao najstarije kulturno-umjetničko udruženje, koje treba dodatno osnažiti sa visokoobrazovnim kadrovima. Na ovoj sjednici svečanu zakletvu, kao novi vijećnik ispred SDP-a, je položio Svjetlan Bešić, koji je imenovan umjesto dosadašnjeg vijećnika Sanela Buljubašića, koji je podnio ostavku. Izvještaj o povredi kodeksa ponašanja sa prijedlogom izricanja mjera vijećnici nisu podržali.

Izvještaj sa 33. sjednice Općinskog vijeća Srebrenik

Na 33. sjednici Općinskog vijeća Srebrenik, koja je održana 25.08.2011. godine, najviše se raspravljalo o problematici tri ugostiteljska objekta i to „MTV“, „Paradiso“ i „Bollywood“, koji nemaju adekvatnu dokumentaciju za rad, ali je rješenje, prema raspravama vijećnika, na pomolu, kako bi i ovi objekti nesmetano nastavili raditi. Nakon burne diskusije i brojnih prijedloga od strane vijećnika, usvojen je predloženi Zaključak uz prihvatanje pojedinih prijedloga vijećnika, o čemu ćemo detaljnije pisati u narednom broju Biltena. Zbog nedovoljnog punjenja budžeta, u Izvještaju za izvršenje budžeta u prvih šest mjeseci podvučen je deficit od blizu 600.000 KM, gdje je načelnik Bajrektarević istakao kako se u drugoj polovini godine nada boljem prilivu sredstava i punjenju budžeta, da bi na kraju



Detalj sa 33.sjednice OV-a Srebrenik

ovaj Izvještaj bio i usvojen. Usvojen je i Prijedlog reorganizacije Organa uprave Općine Srebrenik, kojim su od bivše Službe za budžet, poduzetništvo i nadzor formirane dvije Službe (formirana je jedna potpuno nova Služba u koju će se smjestiti dio poslova koje je do sada obavljala Služba za budžet, poduzetništvo i nadzor i dio poslova koji se trenutno obavljaju u Službi za prostorno uređenje, stambeno-komunalne poslove i obnovu a koji se odnose na lokalnu infrastrukturu i formirana je Služba za finansije i nadzor) a istovremeno je došlo do spajanja Službe za društvene djelatnosti, raseljena i izbjegla lica i Službe za boračko-invalidsku zaštitu u jednu

Službu (o navedenom ćemo takođe uskoro detaljnije pisati).

Rok za implementaciju navedenog je 6 mjeseci od dana objavljivanja u Službenom glasniku općine Srebrenik. Općina Srebrenik uskoro će dobiti i poslovne zone. Na ovoj sjednici usvojena je odluka o izgradnji poslovne zone na relaciji od Ježinca do Špionice, a potvrđeno je da će u narednom periodu to biti učinjeno i za poslovne zone kod firme d.d. „Ingram“ i d.o.o. „Corn flips“ u Babunovićima. Vijećnici su prihvatili i Program gospodarenja državnim poljoprivrednim zemljištem, kako bi se povećale proizvodne sposobnosti poljoprivrednog zemljišta te riješio način korištenja uzurpiranog poljoprivrednog zemljišta. Dosta se raspravljalo i o Informaciji o stanju u oblasti fizičke kulture i sporta, gdje se najviše govorilo o problematici u N.K. „Gradina“, koji će se pokušati prevazići uz pomoć načelnika, a u narednih 30 dana će se organizirati Skupština te detaljno sagledati stanje u ovom najpoznatijem sportskom kolektivu na ovom općinskom području. Prihvaćena je i Odluka da je od javnog interesa izgradnja kanalizacionih kolektora sa uređajem za prečišćavanje otpadnih voda u Babunovićima, dok su date saglasnosti za izgradnju spomen-obilježja u MZ Cerik i Crveno Brdo, a takođe je prihvaćen i Nacrt odluke o izmjenama i dopunama poslovnika o radu Općinskog vijeća, koje su uglavnom odnose na rad Komisije za zaštitu nacionalnih manjina. Vijećnici su izglasali i Prijedlog zaključka da se općinskom načelniku odobri saglasnost za odgođeno plaćanje rente i uređenja d.o.o. „Gromex“ Srebrenik za SPO „Spahijina njiva“, „Medžlisu IZ Srebrenik“ za džamiju u Čehajama i Općini Srebrenik za novu općinsku zgradu, sve ukupne vrijednosti većoj od 800.000 KM, što je omogućeno nedavno donesenim Zakonom. Utvrđeno je da se proglasi od javnog interesa izgradnja bunara u Podorašju za snabdijevanje vodom ovog općinskog područja, dok je odlučeno da se problematika nastala na relaciji MZ Kiseljak-JKP „9. septembar“ u vezi organizacije vašara, riješi tako da MZ Kiseljak kao i prethodnih godina naplaćuje iznajmljivanje placeva za štandove na ovoj manifestaciji. Došlo je i do promjena u članstvu dviju općinskih komisija, pa će tako umjesto Muzafera Karića u Komisiji za budžet i ekonomski razvoj ubuduće biti Selmin Muratović, a u Komisiji za dodjelu građevinskog zemljišta umjesto Sanela Buljubašića biti Haziz Mešaljić.

Izvještaj sa 34. sjednice Općinskog vijeća Srebrenik

Najveću raspravu na 34. sjednici Općinskog vijeća Srebrenik, koja je održana 29.09.2011. godine, izazvala je odluka o javnim parkinzima, koja se ovoga puta raspravljala u nacrtu, tako da će do njenog konačnog usvajanja vjerovatno pretrpjeti još neke izmjene. Prema nacrtu ove odluke predviđeno je da se u I zoni naplaćuje po 1KM po satu, a u II zoni 0,50KM po jednom satu. Predviđena su 22 parking-mjesta u gradu, a upravljanje i održavanje istih će biti povjereno JP „9. septembar“ Srebrenik. Veliku pažnju vijećnika privukla je i Informacija o vodosnabdijevanju, gdje je, ionako problematičnu situaciju sa vodosnabdijevanjem, dodatno usložila gotovo dvomjesečna ljetna suša, tako da je intervenisano u čak 14 mjesnih zajednica sa po nekoliko cisterni, kako bi se mještanima obezbijedilo koliko-toliko vode. Inače, vodosnabdijevanje je jedan od najvećih problema na ovom općinskom području i rješavanje istog će se morati dodatno intezivirati, kazano je na ovoj sjednici OV Srebrenik, dok je Informacija o formiranju cijene vode skinuta s Dnevnog reda. Prihvaćen je Prijedlog odluke o izmjeni i dopuni izgradnje infrastrukture za 2011. godine, a koji se odnosi na sanaciju puta Šiljići-Ramići u duljini od 500 metara, zatim asfaltiranje puta u Lisovićima za Musiću u istoj duljini, te izgradnju javne rasvjete u Babunovićima, Špionici Centar te N.N. Luka. U nacrtu se raspravljalo i o zajedničkoj komunalnoj potrošnji, gdje je naglašeno da se pokuša i u ruralnim sredinama odvoz smeća obavljati jednom sedmično, a u užem gradskom jezgru uraditi boksove za smeće, s obzirom da se tokom vikenda nakupi dosta smeća. Podcrtan je i problem sa psima lutali-



Detalj sa 34.sjednice OV-a Srebrenik

cama, gdje je kazano da se nazire rješenje u saradnji sa Veterinarskom stanicom, čije je formiranje nadzornog odbora, koji će činiti: Smajlović Mujo i Nuhanović Sead ispred osnivača ove ustanove i Ajdaslić Mirsad iz reda uposlenika, prihvaćeno. Usvojena je i informacija o konstituisanju mjesnih zajednica, gdje je problem bio u MZ Potpeć, ali on je prevaziđen. Naglašeno je i to da se ubuduće treba razmišljati o tome da ubuduće građani biraju predstavnike u mjesnim zajednicama, a ne političke partije. Prihvaćen je i Pravilnik o postupku davanja u zakup poljoprivrednog zemljišta u vlasništvu države, zatim Odluka o izmjenama i dopunama poslovnika o radu Općinskog vijeća, zatim odluka o pristupanju reviziji regulacionog plana u Tinji, kao i nacrt Zaključka o davanju saglasnosti na Statut JZU „Gradska apoteka“.

Potpisani ugovori sa OCD

Dana 24.08.2011.g. u Plavoj sali srebreničkog Doma kulture, svečano su potpisani ugovori s predstavnicima organizacija civilnog društva (OCD) s područja srebreničke općine, čiji su projekti odabrani i koji će se finansirati sredstvima općina i Evropske unije u okviru projekta LOD II. Navedenoj svečanosti su prisustvovali predstavnici UG Penzionera i civilnih invalida I i II kategorije općine Srebrenik i UG „Pipol“ Tuzla-ogranak Srebrenik, čiji su projekti odabrani za realizaciju, predstavnici općine Srebrenik Muhamed Jašarević, šef Službe za društvene djelatnosti, raseljena i izbjegla lica i Nihad Mehmedović, stručni saradnik za pitanje NVO-a te predstavnici medija. Kako je na ceremoniji navedeno u okviru UNDP projekta jačanja lokalne demokratije II – LOD II općina Srebrenik je okončala proces odabira projekata prema Javnom pozivu od 19.05.2011. g. S obzirom da su se ove aktivnosti sprovodile zajedničkim radom općine Srebrenik i LOD II projekta evaluaciju pristiglih projektnih prijedloga vršila je komisija u sastavu od po dva člana UNDP BiH i predstavnika općine i jedan predstavnik NVO sa područja općine Srebrenik. Ukupno je na adresu općine pristiglo 7 projektnih



prijedloga od kojih je 2 izabrano kroz kompetitivni proces. Planirano je da se u odabrane projekte uloži 87.537,60 KM od čega će općina sufinansirati 10% od ovog iznosa. Organizacije civilnog društva će kroz realizaciju ovih projekata raditi na rješavanju aktuelnih pitanja iz oblasti socijalne uključenosti osoba sa posebnim potrebama, a posebno djece u društvene tokove kao i podizanje svijesti kod ljudi, a prije svega djece i omladine o značaju zaštite životne sredine i okoliša, te time doprinijeti da osobe sa posebnim potrebama bez obzira na hendikep koji imaju mogu normalno živjeti i biti prihvaćeni u sredini gdje borave bez predrasuda

ostalih članova zajednice, kao i podizanju svijesti kod djece i omladine o značaju zaštite životne sredine po zdravlje svih stanovnika općine Srebrenik i šire. Krajnji rok za završetak projekta je mart 2012.g. Sledeći projekti OCD-a će biti realizovani kroz projekat LOD II: **1)"Formiranje dnevnog boravka djece sa posebnim potrebama"** kandidovan od strane UG Penzionera i civilnih invalida I i II kategorije općine Srebrenik finansiran sa 69.833,00 KM **2)"Zdravlje i okolina"** kandidovan od strane UG „Pipol“ Tuzla ogranak Srebrenik finansiran sa 17.704,60 KM

Nermin Tursić na svečanoj akademiji povodom Dana Bošnjaka Kosova 2011

Dan Bošnjaka Kosova, 28. septembar, obilježen je širom Kosova, u mjestima u kojima žive Bošnjaci, svečano i dostojanstveno. Ovo je bila izuzetna prilika da se Bošnjaci okupe, da pokažu svoje humane vrijednosti, da prezentiraju svoju kulturu, tradiciju, da se prisjete svoje historije. Tako je bilo u Peći, Istoku, Dragašu, Mitrovici, Prištini te Prizrenu, u kojem inače živi najveći broj Bošnjaka. Nizom kulturnih i sportskih manifestacija kosovski Bošnjaci obilježili su svoj dan. Na centralnoj manifestaciji, svečanoj akademiji u prizrenskom Domu kulture, prisustvovao je i premijer Kosova Hašim Tači sa još nekoliko članova svog kabineta, kao i ugledni gosti i istaknute ličnosti iz oblasti kulture, književnosti, nauke te politike iz BiH, Crne Gore, Albanije te po prvi puta i iz Bugarske. Iz BiH zapažen nastup su imali Edin Ramić, savjetnik bošnjačkog člana Predsjedništva BiH Bakira Izetbegovića te Nermin Tursić, savjetnik načelnika općine Srebrenik, koji je ovom prilikom održao predavanje o historiji i perspektivi Bošnjaka na ovim trusnim balkanskim područjima, koje je izazvalo veliku pažnju. Proslava Dana Bošnjaka, podržana je od strane Vlade Kosova i ima za cilj očuvanje i afirmaciju, kulturnih i jezičkih osobenosti kosovskih Bošnjaka, jačanje multietničnosti, demokratije i poštivanje prava svih etničkih zajednica u Republici Kosovo. -Na Kosovu je prisutno oko 40.000 Bošnjaka. Međutim, tu treba dodati i onih 10.000, pod raznim okolnostima, izjašnjenih kao Albanci ili Turci, a koji mahom žive u Prizrenu. Tako da možemo reći da bosanskim jezikom govori



Nermin Tursić

50.000 ljudi. Ovom broju treba dodati još najmanje 20 – 30.000 Bošnjaka koji su na Zapadu kao 'gastarbajteri', i 20 – 30.000 muhadžira odn. iseljenih sa Kosova uoči rata 1999. g. i neposredno poslije njega. Imamo oko 50 džemata(džamija) gdje se vazi na bosanskom jeziku, 40-tak osnovnih škola na bosanskom jeziku, srednjoškolsku nastavu u Priz-

renu, Dragašu, Peći, Istoku, Mitrovici i Prištini, i tri smjera na dva fakulteta, Edukativnom u Prizrenu (2) i Menadžmentu u Peći (1) te od prije par godina i odjeljenje medrese na bosanskom jeziku pri isturenom odjeljenju prištinske Alaudin medrese. Imamo i desetak udruženja – NVO-a...", rekao nam je Isak Meta, predsjednik Bošnjačkog savjeta Kosova – organizatora ovogodišnje proslave Dana Bošnjaka Kosova, koji se zahvalio svima koji su se odazvali pozivu organizatora i svojim prisustvom uveličali ovu manifestaciju.

Potpisan ugovor za izgradnju Centra za djecu s posebnim potrebama

Načelnik općine Srebrenik Mehmed Bajrektarević i UNDP-ov rezidentni koordinator Jurij Afanasiev, potpisali su dana 02.10.2011. godine ugovor o izgradnji Centra za djecu s posebnim potrebama u Srebreniku. Riječ je o Centru kapaciteta 60 djece s posebnim potrebama a koja će koristiti dnevni boravak sa svojim učiteljima. –Izgradnja Centra početak će za tri



Detalj sa potpisivanja ugovora

sedmice, s obzirom da je općinska administracija ovaj posao odradila dosta efikasno očekujemo da će kompletan posao biti okončan na proljeće, kazao je Afanasiev. Načelnik općine Mehmed Bajrektarević nije



Obraćanje ambasadora Kraljevine Španije u BiH

skrivao zadovoljstvo što će ova djeca dobiti adekvatne prostorije za boravak. –Želja nam je da se ova djeca što bolje integrišu u društvu i zato smo učinili sve da



Obraćanje ministra u Vladi TK-a Senada Hasića

dobijemo ovaj Centar, koji će uz Općinu finansirati Vlada TK te UNDP, kazao je Bajrektarević. S obzirom da je uz Općinu i UNDP, značajna sredstva za izgradnju Centra izdvojila i Vlada TK, u ime ove institucije ceremoniji je



Trenutak otvorenja turističkog info pulta

prisustvovao i ministar za rad i socijalnu politiku Senad Hasić, koji je rekao: –Ova kuća je izuzetno značajna stvar i ovi ljudi u potpunosti zaslužuju da imaju adekvatne uslove za život, kao i svi mi, kazao je Hasić.



Nastup KUD-a „Mehmed Ibrahimović“

Nakon potpisivanja ovoga ugovora, svečano je otvoren i Turistički info-punkt na ulazu u šetalište Alije Izetbegovića u Centru Srebrenika, a nakon toga i novosagrađeni most te suvenirnica na Starom gradu Srebreniku. Oba projekta, kao i projekat postavljanja vertikalne turističke signalizacije, su urađena u cilju poboljšanja turističke promocije općine Srebrenik. Ovim povodom, gostima su se obratili i španjolski ambasador

u BiH, njegova ekscelencija Alejandro Alvaro Gonzales San Martin, izrazivši sreću što je njegova zemlja bila u prilici da pomogne promociju turizma u Srebreniku, te Sanjin Halilović, ministar razvoja, poduzetništva i obrta u Vladi, koji je izrazio zadovoljstvo viđenim u Srebreniku.

Novi most na ulazu u Stari grad Srebrenik



Rekonstrukcija regionalnog puta Srebrenik-Gračanica

Dana 26.09.2011.godine, direktor Direkcije cesta TK-a Sulejman Brkić posjetio je Srebrenik i zajedno sa načelnikom općine Mehmedom Bajrektarevićem, nadzornim organom, predstavnikom izvođača i saradnicima, obišao trasu regionalnog puta Srebrenik - Gračanica. Razlog ove posjete je nastavak rekonstrukcije regionalne ceste u dužini od 2 kilometra (od Džamije u Babunovićima do skretanja za naselje Lušnica) na kome se nalazi i nekoliko klizišta koje je potrebno kvalitetno sanirati. Radovi na jednom dijelu trase gdje se nalaze dva klizišta su do sada bili obustavljeni od strane vlasnika zemljišta, zbog neriješenih imovinsko pravnih odnosa, ali su sve nesuglasice u međuvremenu otklonjene i postignut je dogovor da se radovi



Rekonstruiše se regionalni put od džamije u Babunovićima do skretanja za Lušnicu

nastave. Radove izvodi firma "ROADING" d.o.o. iz Gračanice kao najpovoljniji ponuđač, a cijena ugovorenog posla je 650.000 KM. Troškove rekon-

strukcije u cijelosti finansira Direkcija cesta TK-a. Do trenutka izlaska biltena navedeni put će najvjerovatnije biti saniran i asfaltiran.


U asfaltiranje puta od Badelke do mosta preko rijeke Tinje uloženo 176.000 KM



Dionica puta pored OŠ Špionica prije...

Polaganjem završnog sloja asfalta, sredinom septembra 2011.godine, završen je projekat rekonstrukcije i asfaltiranja lokalnog puta u Špionici Centar od Badelke do mosta preko Tinje u blizini romskog naselja. Kako smo saznali od Halida Kovača-koordinatora realizacije infrastrukturnih projekata u općini Srebrenik, riječ je o realizaciji ugovora potpisanog još 2010.godine, a istim je asfaltiran put širine 3,5 m na navedenoj dionici u dužini od oko 1000m. Radove je izvela firma „Jata

Group" d.o.o. Srebrenik a ukupna vrijednost investicije je 176.160 KM. Zanimljivo je da je za realizaciju navedenog projekta, obzirom da put jednim dijelom prolazi i pored izbjegličkog kampa u Špionici Centar, Ministarstvo za rad, socijalnu politiku i povratak Vlade TK-a doniralo 50.000 KM a Ministarstvo raseljenih osoba i izbjeglica FBiH doniralo 70.000 KM, dok je preostali iznos plaćen iz budžeta općine Srebrenik. Asfaltiranjem ove dionice obezbijeđeni su kvalitetniji životni uslovi za lokalno stanovništvo, tako da će prašina i brojne rupe na dosadašnjem makadamskom putu, ostati samo ružna uspomena mještanima Špionice Centar.



...i poslije asfaltiranja

Manifestacija OGUS 2011



Umjetnici koji su učestvovali na manifestaciji "OGUS 2011"

Dana 06.08.2011.g., na platou ispred Starog grada Srebrenika iz 1333.godine u Gornjem Srebreniku, zvanično je otvorena kulturna manifestacija „OGUS 2011“ (Srebrenik otvoreni



Obraćanje načelnika Mehmeda Bajrektarevića

grad umjetnosti), koja se tradicionalno obilježava još od davne 1977. godine. Pred nekoliko stotina posjetilaca, pred zalazak sunca, zvucima zurlaša započeo je ovogodišnji OGUS, a nakon uvodnih zvuka iz frula, zurla i bubnjeva domaćih svirača, gostima se obratio općinski načelnik Mehmed Bajrektarević, koji je između ostalog kazao: – Čast nam je što se OGUS uspješno obilježava sada već 34 godine, a i pored teške ekonomske situacije trudimo se da svake godine izdvajamo određena novčana sredstva, kako bi ova manifestacija bila sve bolja, i iskre-



Nastup zurlaša

no se nadam da će građani od mnoštva, već standardnih kulturnih sadržaja, pronaći nešto što će ih zanimati. Sve polazi i sve se na kraju vraća Starom gradu i kako vidite izgradnjom novog mosta na Starom gradu, suvenirnice a uskoro i ostalih sadržaja, nadamo se da će isti konačno zasjati u pravom sjaju



Nastup KUD-a „Mehmed Ibrahimović“ Srebrenik

te postati istinska turistička destinacija. Manifestaciju je zvanično otvorio predsjedavajući

Skupštine TK-a Bajazit Jašarević, koji je između ostalog kazao: – „Iz godine u godinu smo svjedoci kako umjetnici sa raznih strana svijeta dolaze u Srebrenik, a i sinoć smo dočekali nove umjetnike, koji će likovnim djelima, nastalim u ovom predivnom mjestu Srebreniku, obogatiti našu kulturnu ponudu. OGUS je prepoznatljiva kulturna manifestacija na području TK-a i



Detalj sa muzičko scenske izvedbe „Da život bude ljubav“

kao takva ima, i imaće i ubuduće, svaku vrstu naše podrške“. Nakon zvaničnog otvorenja OGUS-a, izvedena je muzičko scenska izvedba „Da život bude ljubav“, koju je režirao Vlado Kerošević. Scenaristi su Dženana Džanić, Siniša Kahvić i Damir Mašić a u predstavi su učestvovali: Fatima Džaferović, Dražen Pavlović, Nedžad Jašarević, Mirza Selimović, Dr Lejla Mešalić i KUD „Mehmed Ibrahimović“ Srebrenik.

Održano Veče saza i sevdaha



Nastup Ahmeta Hogića



Nastup dr. Hašima Muharemovića

Dana 07.08.2011.g, u sklopu manifestacije „OGUS 2011“ održano je „Veče saza i sevdaha“. Organizator BZK „Preporod“ Srebrenik, na otvorenoj pozornici ispred srebreničkog Doma kulture, uspio je okupiti i srebreničkoj publici predstaviti 10 bh. sazlija. Velikom broju okupljenih ljubitelja saza i tradicionalne bosanske sevdalinke predstavili su se Jusuf

Brkić, Enes Imamović, Mehmed Šiljić, Miralem Selimović, Suad Džanić, Osman Suljkanović, Murat Vrabac, Ahmet Hogić, Rajko Simeunović i dr. Hašim Muharemović. Kao specijalni gosti nastupili su Adela Turkić i Muhamed Mujkanović koji su, uz pratnju na sazu Miralema Selimovića, izveli nekoliko bosanskih sevdalinki. Kako je istakao Nermin Tursić, predsjednik BZK „Preporod“ Srebrenik, ovo tradicionalno veče trebalo bi prerasti u jedan od najprestižnijih festivala u BiH, a sve s ciljem da se od zaborava sačuvaju ovaj tradicionalni instrument i neprevaziđena bosanska sevdalinka.

Dječiji dan na OGUS-u 2011



Djeca crtaju svome gradu

Dana 08.08.2011.g., u sklopu manifestacije „OGUS 2011“, ispred Doma kulture u Srebreniku, održane su manifestacije za djecu pod nazivom «Djeca slikaju svom gradu» i «Djeca pjevaju hitove». Oko 120 mališana uzrasta od 2 do 12 godina, na rolni papira dugačkoj oko 20 metara, zajednički crtajući predmete prema slobodnom izboru, imalo je priliku izraziti svoju kreativnost i slikarsko umijeće. Najčeš-

ći motivi su bili iz prirode, Gradina i planina Majevica, a sve radove su ocijenili umjetnici koji borave na koloniji OGUS-a 2011. Ovom prilikom svim mališanima su uručeni i prigodni pokloni. Nakon ovog događaja, na pozornici ispred Doma kulture, održana je tradicionalna manifestacija «Djeca pjevaju hitove», koju su zajednički organizirali Organizacioni odbor OGUS-a i KUD «Mehmed Ibrahimović» Srebrenik. Na festivalu, koji je i ovog puta bio revijalnog karaktera, predstavilo se 9 učenika iz srebreničkih OŠ, mladih izvođača zabavne muzike, čiji je nastup pratilo nekoliko stotina posjetilaca. Organizatori su svim učesnicima uručili prigodne poklone.



Učesnici manifestacije „Djeca pjevaju hitove“

Nagrada Zlatni ban za životno djelo Seji Pitiću



Nagrada Zlatanu Muratoviću za doprinos narodnoj muzici



Specijalno priznanje za životno djelo je dobio Sejo Pitić

Dana 09.08.2011.g., u okviru kulturne manifestacije „Otvoreni grad umjetnosti Srebrenik 2011“, a u organizaciji Udruženja za muzičku djelatnost „Muzik vik“ i Centra za kulturu i informisanje, na pozornici ispred Doma kulture u Srebreniku, održan je Četvrti bosanskohercegovački festival narodne muzike „Zvuci starog grada“. Ovog puta festival nije bio takmičarskog karaktera, a nastupilo je 12 mladih izvođača sevdalinke iz Srebrenika, Zenice, Sapne, Gračanice i Tuzle. Pred velikim brojem posjetilaca odličnom izvedbom sevdalinke predstavili su se Mirela Beganović, Edvin Husarić, Hazemina Piragić, Amina Glušić, Zaim Durić, Adelisa Babajić, Emir Muminović, Damir Baraković, Lejla Zahirović, Edin Šarić, Hasan Brkić i Semir Jahić. Kao specijalni gost nastupio je i doajen bh. sevdalinke Sejo Pitić, kojem su organizatori uručili specijalno priznanje za životno djelo „Zlatni ban“, a ovo priznanje dodijeljeno je i harmonikašu Zlatanu Muratoviću za doprinos narodnoj muzici.



Detalj sa festivala

Biljeg Srebrenika i Ljetna noć u Srebreniku

Dana 10.08.2011.godine, u sklopu manifestacije „OGUS 2011“, na ljetnoj pozornici ispred Doma kulture u Srebreniku, održan je muzičko poetski kolaž „Ljetna noć“ u realizaciji mr. Elvise Sivčevića, klasična gitara i Irfana Kasumovića, glumca i asistenta na Akademiji dramskih umjetnosti Tuzla. Radi se o urbanom i originalnom multi-medijalnom projektu koji na novi način prezentuje našu kulturnu baštinu tj. projektu koji zastupa i objedinjuje muzičku umjetnost, književnost i umjetnost glume. Nažalost relativno mali broj posjetilaca je mogao vidjeti kako mlada generacija vidi klasike umjetnika kao što su Meša Selimović, Aleksa Šantić, Mak Dizdar i dr. te da spoznaju vrijednost i genijalnost naše kulturne baštine. Iako je bila planirana, iz nepoznatih razloga, nije održana promocija "Biljega Srebrenika".



Srebreničkoj publici su se predstavili Irfan Kasumović i Elvis Sivčević

Održan koncert međunarodnog orkestra BalsiKa



Detalj sa nastupa orkestra BalsiKa

Dana 11.08.2011.g., u sklopu manifestacije OGUS 2011, na ljetnoj pozornici ispred Doma kulture u Srebreniku, održan je koncert međunarodnog orkestra "BalsiKa". Orkestar je izveo tradicionalne pjesme jugoistočne Europe aranžirane i pripremljene za različite instrumente od jednostavnih do težih dionica, što je pjesme učinilo pristupačnima i mladima sa malo muzičkog iskustva. BalsiKa kao

projekat koji simbolizira multikulturalnost, koji spaja mlade različitog uzrasta, nacije i konfesije, ima za cilj da proširi svoje djelovanje na zemlje u regionu. BalsiKa je međunarodni orkestar koji je nastao saradnjom entuzijasta dva grada, Tuzle i Strasbourg-a (FR), orkestar koji se razvio iz malog vokalno instrumentalnog ansambla u nestandardni orkestar koji okuplja preko 40-ak mladih ljudi u starosnoj dobi od 15-23 godine. Orkestar vode paralelno u Strasbourg-u i Tuzli dvojica gitarista J.C.Chojcan (Žan Klod Šoškan) i Nedim Tinjić.

Održan rok koncert grupe „Generacija bez kompasa“



Nastup GBK na OGUS-u 2011

Dana 12.08.2011.godine, u sklopu manifestacije „OGUS 2011“, na pozornici ispred Doma kulture održan je rok koncert grupe „Generacija bez kompasa“ pod nazivom „Bijelo dugme tribute band“. Pred oko 200 posjetilaca prvo je nastupila mlada grupa Ultrazvuk iz Srebrenika, koja je dobila priliku da se još jednom kvalitetno predstavi pred srebreničkom publikom, nakon čega je nastupila grupa „Generacija bez kom-

pasa“, koja je izvela uglavnom pjesme iz repertoara Bijelog dugmeta. Trenutna postava grupe, koju čini kombinacija muzičara iz Srebrenika i Špionice, je još jednom oduševila svojim nastupom i, malo je reći, osvježila repertoar ovogodišnjeg OGUS-a.



Kao predgrupa je svirala grupa „Ultrazvuk“ iz Srebrenika

Vinkovačko veče u Srebreniku



Nastup tamburaškog orkestra Dike

Dana 13.08.2011.godine, u sklopu manifestacije „OGUS 2011“, na pozornici ispred Doma kulture u Srebreniku, održana je manifestacija pod nazivom „Vinkovačko veče“. U okviru programa posjetiocima su se predstavili članovi tamburaškog orkestra „Dike“ iz Vinkovaca, koji slave 25. godina uspješnog rada i koji su izvedbom pjesama iz Slavonije, kao i vlastitim obradama sevdalinki, oduševili, nažalost, malobrojne posjetioce. Gostovanje tamburaškog orkestra rezultat je višegodišnje uspješne saradnje gradskih vlasti Vinkovaca i Srebrenika, ali i kulturnih i sportskih društava ova dva grada. Nastupu tamburaša iz Vinkovaca prisustvovali su gradonačelnik Vinkovaca dr. Mladen Karlić sa saradnicima i načelnik općine Srebrenik Mehmed Bajrektarević.

Smotrom folklor završen OGUS 2011

U sklopu realizacije programskih sadržaja „OGUS-a 2011“ i obilježavanja 36. godišnjice postojanja i rada Kulturno-umjetničkog društva „Mehmed Ibrahimović“, u Srebreniku je održana smotra folklor, na kojoj je, uz domaćine, učestvovalo još sedam KUD-ova. Rođendansku proslavu jednog od najstarijih kulturno-umjetničkih društava na području Tuzlanskog kantona svojim dolaskom uveličali su članovi kulturno-umjetničkih društava BZK „Preporod“ Kladanj, KUD „Halisije“ Kalesija, KUD „27. juli“ Prokosovići, SKD „Prosvjeta“ Brčko, GKUD „Bugojno“ Bugojno, KUD „Ekrem Mujkić“ Ilidža-Sarajevo, HKD „Napredak“ Špionica-Srebrenik i KUD „Mehmed Ibrahimović“ Srebrenik. Obučeni u živopisne narodne nošnje, domaćini i njihovi gosti održali su defile ulicama Srebrenika, a potom su na pozornici ispred Doma kulture u Srebreniku upriličili cjelovečernji kulturno-umjetnički program. Velik broj posjetilaca imao je priliku uživati u spletu igara iz Bosne i Hercegovine, ali i iz svih krajeva s prostora bivše zajedničke države. Realizacijom navedenih sadržaja je i završen program ovogodišnjeg OGUS-a, za koji bi mogli reći da je bio na nivou dosadašnjih, kako obimom tako i kvalitetom.



Detalj sa smotre folklor



Održani „6. Dani kruha i plodova zemlje“

U prisustvu više stotina mještana Špionice i gostiju, kako iz naše zemlje tako i iz inostranstva, u organizaciji HKD „Napredak“ Srebrenik, u ovome naselju općine Srebrenik, održani su 6. Dani kruha i plodova zemlje. Riječ je o tradicionalnoj kulturnoj manifestaciji koja ima za cilj da se popularizuju i pokušaju otrgnuti od zaborava stari recepti iz domaće kuhinje. Ovom prilikom Filka Veselčić, predsjednica HKD „Napredak“ iz Srebrenika je kazala: - „Jako smo sretni što ova manifestacija iz godine u godinu dobiva na



Prisutni su bili brojni ugledni gosti

sve većem značaju i što na jedan način postaje sve prepoznatljivija. Očuvanje tradicije za svaki narod je od posebnog značaja, a posebno kada se ista odnosi na hranu, a dobro znamo kako se danas nezdravo hranimo“. Izuzev predstavnika izvršne i zakonodav-



Prezentovana su brojna jela i piće, proizvedena na tradicionalan način

ne vlasti Općine Srebrenik, ovoj manifestaciji prisustvovao je i Franjo Topić, predsjednik HKD „Napredak“ BiH, zatim hrvatski konzul u BiH Josip Juras, UN-ov rezidentni koordinator Jurij Afanasiev, španjolski ambasador u BiH, Alejandro Alvaro Gonzales San Martin, kao i brojni drugi gosti. Nakon ceremonije i svečanog dijela programa kojeg su, svojim nastupom, obogatili učenici ove područne škole recitacijama kao i KUD iz Husina izvedbom spleta igara iz Bosne, gostima su domaćice pripremile i ponudile jela i pića proizvedena po starim receptima kao što su: domaća rakija, prirodni sokovi, džemovi, razni kolači, pite i jela od tijesta...

Održana „Mala seoska olimpijada“

U organizaciji HKD „Napredak“ Srebrenik, na nogometnom igralištu u Srednjoj Špionici, početkom avgusta 2011.g., održana je Mala seoska olimpijada, na kojoj je učestvovalo oko 120 djece predškolskog uzrasta i učenika osnovnih škola. Podijeljeni u pet kategorija u muškoj i ženskoj konkurenciji takmičili su se u trčanju na 50 i 100 metara, zatim trčanju u vrećama, nošenju jajeta u kašici, skoku u dalj iz mjesta i bacanju kamena s ramena. U trčanju na 50 metara za djecu predškolskog uzrasta prva mjesta su u svojim kategorijama osvojili Klaudija Jozić i Semir Delić, a u trčanju na 100 metara prva mjesta su osvojili Sara Veselčić, Adnan Jukić, Dinela Čenanović, Josip Veselčić, Vladana Jurić, Marko Veselčić, Laura Veselčić i Dario Josić. U trčanju u vreći prva mjesta u svojim kategorijama osvojili su Marko Veselčić, Dinela Čenanović, Daniel Babić, Maja Babić, Boris Jurić, Alma Dedić i Dario Josić. U skoku u dalj iz mjesta prva mjesta su osvojili Ahmet Okić, Dinela Čenanović, Antonio Veselčić, Ilijana Knežević, Marko Veselčić, Dario Josić i Matea Veselčić. U disciplini nošenja jajeta u kašici prva mjesta u svojim kategorijama osvojili su Ivan Veselčić, Adriana Veselčić, Antonio Veselčić, Katarina Marković, Meša Lelić, Ivan Paradžiković i Lejla Hasanbašić. U disciplini bacanje kamena s ramena najuspješniji u svojim kategorijama bili su Marko Veselčić, Patricia Gudeljević, Antonio

Veselčić, Maja Babić, Mateo Marković, Lejla Hasanbašić i Ivan Marković. Takmičarima koji su osvojili prva mjesta u svojim kategorijama predsjednica HKD „Napredak“ Srebrenik Filka Veselčić uručila je medalje i prigodne poklone, a u revijalnom dijelu Male seoske olimpijade održano je i takmičenje seniora u navlačenju konopa, u kojem su predstavnici Srednje Špionice bili bolji od ekipe dijaspore.



Medalje i prigodne poklone je podijelila Filka Veselčić

Promocija knjige „Riječi“ autora Bediuzamman Said Nursija



Detalj sa promocije knjige "Riječi"

Dana 08.10.2011.godine od 19 sati u sali Medžlisa IZ Srebrenik, Asocijacija Mladih SDA u saradnji sa Izdavačkom kućom „Rejhan“ iz Sarajeva, organizovala je promociju knjige „Riječi“ autora Bediuzamman Said Nursija. Promotori su bili dr. sc. Sead Seljubac i predstavnik izdavačke kuće „Rejhan“ Voloder Sanadin. Generalni sponzor promocije bila je Donella d.o.o. Srebrenik a značajna je i podrška Medžlisa IZ Srebrenik. „Svjedoci smo da se Srebrenik u postratnom periodu intezivno gradio i do danas se prilično proširio i obnovio. Sve to lijepo izgleda ali nažalost moramo primijetiti i da mu fali jedna dimenzija više, fali mu malo duše. Fali Srebreniku

malo osjećaja za kulturu, za običaje, za vjeru. Možda je to do odgoja, možda je ipak nešto drugo, što nije moguće objasniti. Nažalost i vjerovatno radi ovog navedenog gotovo sve promocije knjiga su veoma slabo posjećene.“ -rekao je na otvaranju promocije, u ime Asocijacije Mladih SDA Srebrenik, Adnan Bjelić. Said Nursi predstavlja islamskog mislioca i obnovitelja islamske misli iz perioda poslednjih decenija Osmanskog hilafeta i prvih trideset pet godina Republike Turske. Zbog neprihvatanja borbe za nacionalnu ideju on je izbjegavao političko djelovanje, mada je političarima laicističke Turske smetao sa svojim islamskim idejama pa je često, bez krivnje, svrstavan u red političkih prijestupnika i kao takav često i osuđivan. U zatvorima i izgnanstvima je proveo koliko i Mendela ili Adem Demaći, ali svoj zatvorski staž nije kapitalizirao na način političke promocije, nego na širenju svojih vjerskih ideja. Iako sklon republikanskom sistemu, on ne prihvata revoluciju koja ne uključuje vjeru, čvrsto ostajući na stajalištu da i republika može imati šerijatske zakone. Treba istaći da je Nursi veoma tolerantan prema različitostima unutar istog civilizacijskog kruga, ali i izvan toga kruga. Knjiga „Riječi“ je jedan od ukupno 12 tomova u kojoj su sabrana sva djela Saida Nursija. Na 977 stranica u 33 poglavlja "Riječi" obrađene su brojne teme: govori se o ibadetu, imanu, o odnosu muslimana prema dužnostima i obavezama, o iskušenjima, o ahiretu, o mudrosti vremenske podjele namaza. o proživljenju, o dokazima poslanstva Muhammeda a.s., o Kur'anskim nadnaravnostima, o Božijem određenju i slobodnoj volji i dr.

Na „Danima evropskog naslijeđa“, mladi uspješno promovisali grad Srebrenik

U organizaciji Federalnog ministarstva kulture i sporta i općine Tešanj, u Tešnju je 14. i 15. 09. 2011.g. održana kulturna manifestacija *DANI EVROPSKOG NASLIJEĐA*. Riječ je o manifestaciji koja se od 1991. godine održava u mjesecu septembru u evropskim zemljama, a utemeljena je od strane Vijeća Evrope uz podršku Evropske zajednice u Strazburu, Poveljom o evropskom graditeljskom naslijeđu. Program *Mladi i naslijeđe* provodi se u osnovnim i srednjim školama Federacije BiH i ima za cilj educiranje mladih o kulturnom naslijeđu Bosne i Hercegovine. Ove godine u programu *Mladi i naslijeđe* je učestvovalo 85 osnovnih i srednjih škola iz 17 gradova FBiH. Pristiglo je preko 800 učeničkih likovnih, literarnih, dokumentarističkih i video radova te veliki broj fotografija i maketa na temu: "Graditeljsko naslijeđe Bosne i Hercegovine". Oni najuspješniji su u Tešnju prezentirali svoje radove za koje su primili i nagrade. Među nagrađenima su bili i učenici Prve osnovne škole Srebrenik te učenici Mješovite srednje škole Srebrenik zajedno sa svojim mentorima, prof. Kimetom Buševac i prof. Sadihom Mehmedovićem. Najuspješnija škola na ovoj manifestaciji je bila Prva osnovna škola Srebrenik, čiji su učenici nagrađeni za filmove „Povratak“ i

i „Srebrnik Grad“, te za fotografije srednjovjekovnog grada Srebrenika. Učenice MSS Srebrenik su nagrađene za maketu Starog grada Srebrenika. Naši učenici su se vratili sa nagradama, ali, što je daleko bitnije, i sa novim iskustvom, doživljajima i divnim uspomenama. Učenici i profesori su bili smješteni u motelu *PLAVI* u Jelahu, zajedno sa učenicima iz Fojnice, Kiseljaka, Sarajeva, Bosanske Krupe, Bihaća, Vareša..., a tokom boravka su obišli nacionalne spomenike grada Tešnja.



Naše predstavnice: Anela Dorić, Majda Mehmedović, Ilma Mutapčić i Samra Ibrić sa prijateljicom

Održana manifestacija Dani polja hibridnog kukuruza

Sredinom septembra 2011 g., u organizaciji Poljoprivrednog zavoda Tuzlanskog kantona, u krugu Voćnog rasadnika u Špionici kod Srebrenika, održana je tradicionalna manifestacija „Dani polja hibridnog kukuruza“. Uz predstavnike općinskih i



Obilazak oglednog polja sa 30 vrsta hibridnog kukuruza

kantonálnih vlasti, te predstavnike poljoprivrednih zadruga i vodećih proizvođača sjemenskog kukuruza, manifestaciji je prisustvovalo i preko 100 poljopriv-

rednih proizvođača s područja sjeveroistočne Bosne. Učesnici manifestacije obišli su ogledno polje na kojem je proljetos zasijano oko 30 vrsta hibridnog kukuruza vodećih selekcionara „Instituta za ratarstvo i povrtlarstvo“ iz Novog Sada, Instituta za kukuruz iz Zemuna, „Pioneera“ iz SAD-a, „KWS“-a iz Njemačke, „Syngente“ iz Italije i BC instituta iz Zagreba. Okupljeni poljoprivredni proizvođači imali su se priliku uvjeriti kako pojedini hibridi podnose ekstremne toplote i sušu, te koje vrste hibridnog kukuruza daju najbolje prinose u našim klimatskim uslovima. U razgovoru sa stručnjacima iz eminentnih svjetskih instituta za oplemenjivanje bilja, poljoprivrednici su imali priliku čuti i korisne informacije o najnovijim generacijama hibrida koje će im pomoći prilikom izbora sjemena kukuruza za predstojeću sjetvu. Susreti primarnih poljoprivrednih proizvođača, poljoprivrednih stručnjaka i predstavnika vlasti iskorišteni su i za razgovor o aktualnim problemima koji prate ratarsku proizvodnju. Ocijenjeno je da će, zbog ekstremnih vrućina tokom cijelog ljeta i dugotrajne suše prinosi kukuruza biti znatno smanjeni, što će imati za posljedicu poskupljenje ove žitarice, ali i mesa i mesnih prerađevina.

Ministar Jerko Ivanković-Lijanović posjetio Srebrenik

Dopremijer FBiH i federalni ministar poljoprivrede, vodoprivrede i šumarstva Jerko Ivanković-Lijanović boravio je 01. i 02. 09. 2011. godine u Gradačcu, u povodu 38. međunarodnoga sajma poljoprivrede i prehrambene industrije – Sajma šljive. Dana 01. 09. 2011. godine Ivanković-Lijanović sudjelovao je na svečanosti otvorenja te najstarije specijalizirane sajamske manifestacije u BiH i tom se prilikom obratio okupljenim gostima, izlagačima i



Ministar Jerko Ivanković-Lijanović u Fani

posjetiocima. Naglasio je kako proizvodnja hrane nije samo jedna od djelatnosti kojom se bavimo, nego je poljoprivreda i proizvodnja hrane ključ opstanka bh. stanovništva. Istog dana ministar Ivanković-Lijanović posjetio je poljoprivredne proizvođače u Srebreniku – firmu „Fana“ za preradu voća i povrća, te Voćni rasadnik Srebrenik. Ovom je prilikom ustvrdio kako u poljoprivredi jednaku pažnju treba posvetiti primarnoj proizvodnji, ali i prerađivačkoj, kao i izvozu, te značajnije ulagati u istraživanja. U razgovoru sa



Jerko Ivanković-Lijanović u Voćnom rasadniku

načelnikom općine Srebrenik Bajrektarević Mehmedom i menadžmentom firme je istakao: „Zbog pogrešne politike u posljednjih 15 godina, bez zaštite i s nedovoljno poticaja, proizvodnja hrane je kod nas došla na rub propasti. Trenutačno, 5 puta više uvozimo hrane nego izvozimo, i svake godine iz naše zemlje za hranu ode oko 2 milijarde KM. Stoga, hvala Vam svima koji proizvodite hranu i obećavam Vam da ćete imati moju nesebičnu potporu, kao i potporu Federalne vlade. Zajedničkom borbom pobijedit ćemo sve one koji nam budu stajali na putu da osiguramo dovoljno hrane za domaće stanovništvo“. Ivanković-Lijanović ponovio je kako je ovo Ministarstvo opredijeljeno za saradnju i partnerstvo sa svim poljoprivrednicima, udruženjima, zadrugama, naučnim i stručnim institucijama te svom javnosti, što i jest ključ rješenja svih otvorenih pitanja i siguran put uspjeha i daljnega razvoja domaće poljoprivrede i proizvodnje hrane. U vezi poticaja, naglasio je kako Ministarstvo ubrzano obrađuje sve zahtjeve pristigle iz resornih kantonálnih ministarstava, obećavši kako će Ministarstvo raditi, po potrebi, i u dvije smjene kako bi se do kraja godine u cjelini realizirao Program poticaja.

Održana združena pokazna vježba

U povodu Svjetskog dana prve pomoći, sredinom septembra 2011. godine, na gradskom šetalištu u Srebreniku, održana je združena pokazna vježba podmlatka Dobrovoljnog vatrogasnog društva, Kluba mladih Crvenog krsta i Gorske službe spašavanja Srebrenik. Pred velikim brojem radoznalih građana pripadnici vatrogasnog podmlatka demonstrirali su



Spasavanje povrijeđenog sa 4. sprata

svoje vještine u gašenju požara u jednom od stanova na četvrtom spratu stambene zgrade izazvanog eksplozijom plina, kao i evakuaciji povrijeđenih osoba iz zapaljenog stana. Članovi Kluba mladih Crvenog krsta Srebrenik pokazali su na koji se način pruža prva pomoć osobama povrijeđenim u požaru, dok su hrabri pripadnici Gorske službe spašavanja demonstrirali spuštanje uz pomoć specijalnog užeta povrijeđenih osoba iz zapaljenog stana na četvrtom spratu stambene zgrade. – „Uz prigodno obilježavanje Svjetskog dana prve pomoći, vježba je imala za cilj da se prezentira rad Dobrovoljnog vatrogasnog društva, Gorske službe spašavanja i Crvenog krsta Srebrenik, ali i da se provjeri njihova spremnost za pružanje pomoći u slučaju požara ili elementarnih nepogoda. Cilj nam je

bio i da demonstriranjem naše uvježbanosti utičemo na svijest građana o potrebi postojanja i omasovljenja



Podmladak Vatrogasnog društva Srebrenik

udruženja građana čiji je zadatak pružanje pomoći unesrećenim osobama“, ističe Muhamed Ibrić, koordinator vatrogasnog podmlatka u DVD Srebrenik. Nakon združene vježbe, mladi volonteri Crvenog krsta na više punktova u centru grada i prigradskom naselju Kiseljak realizirali su akciju besplatne kontrole krvnog pritiska kod zainteresiranih građana.



Volonteri Crvenog krsta u akciji

Održan Sajam pčelarstva i pčelarske opreme

U organizaciji Udruženja pčelara „Roj“ Srebrenik, dana je na gradskom šetalištu u Srebreniku održan Sajam pčelarstva i pčelarske opreme, na kojem je svoje proizvode predstavilo oko 40 pčelara iz BiH i Hrvatske. Treći po redu Sajam pčelarstva privukao je značajnu pažnju onih koji se profesionalno bave proizvodnjom meda, tako da je i ovog puta gradsko šetalište bilo u potpunosti u znaku slatkih pčelinjih proizvoda. Učesnike manifestacije pozdravio je Ramo Smajlović, predsjednik Udruženja pčelara „Roj“, a ovogodišnji Sajam pčelarstva zvanično je otvorio načelnik općine Srebrenik Mehmed Barjektarević, naglasivši da resorna kantonalna i federalna ministarstva trebaju još značajnije stimulirati uzgajivače pčela i proizvođače meda i drugih proizvoda od meda, te time dati veći doprinos unapređenju domaće proizvodnje. Organizatori manifestacije, na osnovu ocjene stručnog žirija, uručili su nagrade za najuređeniji izlog, za najbolji literarni rad na temu pčelarstva i za najsladši med, a nagrađeni su i najstariji i najmlađi izlagač. U sklopu



Detalj sa sajma meda

ove tradicionalne sajamske manifestacije održan je i seminar za pčelare, na kojem su o zaštiti pčelinjih društava i prevenciji bolesti pčela govorili eminentni stručnjaci s Veterinarskog fakulteta u Sarajevu.

Otvorena novosagrađena džamija u Čehajama

Dana 23.07.2011.g., u prisustvu oko deset hiljada vjernika, u Čehajama kod Srebrenika je svečano otvorena novosagrađena džamija. Riječ je o jednoj od najvećih i najljepših džamija na području Medžlisa IZ Srebrenik, koju posebno ukrašavaju jedna



Detalj sa otvorenja džamije u Čehajama

velika i osam malih kupola, te munara visoka 50 metara, za čiju izgradnju je sredstva u iznosu od 50.000 KM donirao džematlija Čehaja Bego Avdić. Okupljenim vjernicima obratili su Faruk Vikalo, savjetnik načelnika općine Srebrenik, Refik ef. Hodžić, glavni imam Medžlisa IZ Srebrenik, Husejn ef. Kavazović, muftija tuzlanski i Muhamed ef. Salkić, generalni sekretar Rijaseta IZ BiH. –„Islamska zajednica BiH



Braća Husejn i Bego Avdić-najveći donatori

zapravo se potvrđuje, organizuje i iskazuje kroz izgradnju džamija i obnovu džemata, jer džamije su mjesta u kojima muslimani potvrđuju svoju autentičnost kroz poštivanje uzvišene islamske vjere. Zbog toga upućujem iskrene čestitke Medžlisu IZ Srebrenik i vrijednim džematlijama Čehaja na otvaranju ove prelijepe džamije, ali i obnovi i izgradnji čak 21 džamije u poslijeratnom periodu na području ovog medžlisa, čime su stvoreni idealni uslovi za organizaciju vjerskog života na ovom području", istakao je ef. Salkić. Kako je u svom obraćanju istakao Osman Smajlović, predsjednik Građevinskog odbora, u izgradnju džamije u Čehajama uloženo je milion maraka, a najveći dio sredstava osigurali su mještani ovog naselja. Jedna od najljepših džamija na području srebreničke općine, na



Na otvorenju džamije u Čehajama bilo je prisutno oko 10.000 vjernika

površini od 650 kvadratnih metara, osim prostora za obavljanje namaza, u svom sastavu ima i učionicu za mektepsku nastavu, abdesthanu i gashulanu, kao i prostor za biblioteku i slobodne aktivnosti polaznika mektepske nastave. Obzirom da se radi o savremenom zdanju urađeno je podno grijanje, prostor je klimatizovan a mještani nisu štedjeli ni na mermeru, granitu, ogradi od inoksa a jedna od najskupljih stavki je skupocjena kovana ograda, koja je postavljena oko čitavog kompleksa džamije. Donatorima koji su dali najveći doprinos na izgradnji džamije u Čehajama predstavnici Medžlisa IZ Srebrenik i Muftijstva tuzlanskog uručili su vakufname, a čast da otvori novosagrađenu džamiju pripala je najvećem donatoru Husejnu Avdiću koji je za njenu izgradnju donirao čak 100.000 KM. U noći uoči otvorenja nove džamije u Čehajama, postavljena je izložba islamske kaligrafije. Izloženo je 29 levhi rađenih na platnu, papiru i prokrom limu, autora Zehrudina Muhedinovića iz Srebrenika.



O historiji Čehaja je govorio prof. Safet Omerović

Autor levhi islamskom kaligrafijom se počeo baviti još kao učenik medrese, a do sada je svoje radove predstavio na samostalnim izložbama u Hamburgu i Beču, te brojnim gradovima u BiH. Nakon otvaranja izložbe, na platou ispred džamije u Čehajama održane su i dvije tribine pod nazivom "Islamska kaligrafija u BiH" i "Historijat džemata Čehaje". Velikom broju okupljenih vjernika o islamskoj kaligrafiji govorio je autor izložbe Zehrudin Muhedinović, dok je o historijatu džemata Čehaje govorio profesor historije Safet Omerović, koji je naglasio da je naselje Čehaje formirano daleke 1690.godine, a da je prva džamija izgrađena 1881.godine, na mjestu današnje stare džamije u Čehajama.

Ramazanski bajram u Srebreniku

Jedan od najvećih praznika pripadnika Islamske vjeroispovijesti, Ramazanski bajram, svečano je obilježen i u Srebreniku. Centralna bajramska svečanost održana je u Gradskoj džamiji u Srebreniku,



Detalj sa bajramskog druženja ispred džamije u Čehajama

koju je predvodio imam gradske džamije Emir ef. Brašnjić, a u prisustvu velikog broja vjernika, bajram-namaz je klanjan i u preostalim 40 džamija na području srebreničke općine. Neposredno nakon klanjanja bajram namaza, u nekim džematima poput džemata Čehaje, organizovano je bajramsko druženje vjernika uz



Detalj sa prijema u Medžlisu IZ Srebrenik

razgovor i konzumaciju nazaobilazne baklave i halve te raznih sokova, kao i podjela bajramskih paketića polaznicima mektebske nastave. –Svih prethodnih godina odmah po izlasku iz džamije, nakon čestitanja Ramazanskog bajrama, vjernici su žurili kući, tako da oni koji su postili mjesec Ramazana i koji su se okupljali svako veče na Teravih namazu, ne stignu ni popričati a kamoli sumirati iskustva ovog svetog mjeseca. Od ove godine, zahvaljujući donaciji naših džematlija, na zadovoljstvo svih prisutnih, smo pripremili skromno druženje vjernika od nekih 45 minuta, i ako bogda isto ćemo i ubuduće organizovati-ističe Asim Ibrić, organizator bajramskog druženja u Čehajama. I preostali dio dana je proveden svečano u obilasku najbliže familije i prijatelja. Prvog dana, u organizaciji OO SDA Srebrenik, upriličen je tradicionalni prijem za predstavnike javnog, privrednog, kulturnog i političkog života ove Općine. U povodu Dana šehida, predstavnici Općinske službe za boračko-invalidsku zaštitu Srebrenik i srebreničkih boračkih udruženja u prethodna 4 dana organizirali su tradicionalni obilazak porodica šehida i poginulih boraca na području srebreničke općine, uz podjelu prigodnih poklon paketa. U okviru obilježavanja



Nastup hora Zefir

Dana šehida, predstavnici Medžlisa Islamske zajednice Srebrenik, općinskih vlasti i boračkih udruženja s područja srebreničke općine drugog dana su posjetili šehidska mezarja i spomen-obilježja na području općine Srebrenik, a predsjednik Mevludin ef. Joldić i glavni



Bajramsku akademiju je pratilo nekoliko stotina posjetilaca

imam Refik ef. Hodžić Medžlisa Islamske zajednice Srebrenik su upriličili tradicionalni bajramski prijem za predstavnike općinskih vlasti, privrednike i direktore javnih preduzeća i ustanova s područja naše općine. Tom prilikom su uručili priznanja za najveće donatore izgradnje nove zgrade Medžisa IZ Srebrenik. Program obilježavanja Ramazanskog bajrama završen je predveče na gradskom šetalištu u Srebreniku, gdje je, pred nekoliko stotina gledalaca, održan tradicionalni bajramski koncert, na kojem je nastupio hor "Zefir" sa izvedbom ilahija i kasida.



Sa obilježavanja Dana šehida

Hercegovih 10 godina izvoza i implementiranja integrisanog sistema upravljanja



Detalj sa proslave u firmi Herceg

Prigodnom svečanošću, kojoj su prisustvovali predstavnici privrednog i političkog života općine Srebrenik i TK- te poslovni partneri iz inostranstva, firma „Herceg“ Srebrenik je obilježila desetu godišnjicu izvoza na tržište Evropske unije. –„Izvoz na probirljivo tržište EU počeo je sada već davne 2001. godine i iznosio je svega 458.000 KM ili 9,62 posto ukupnog prihoda ostvarenog u toj godini. U momentu početaka izvoza drušvo Herceg je zapošljavalo 91 zaposlenika od čega samo 2 sa VSS. Početni nastupi na inostranom tržištu zahtijevali su promjene tehničko-tehnoloških potencijala, navika i dostadašnjeg načina razmišljanja. Pet godina kasnije vrijednost izvoza dostigla je

8,48 miliona KM, a u prvih 9 mjeseci 2011 g. društvo „Herceg“ je na tržište EU izvezlo robe u vrijednosti od 11,78 miliona KM ili 69,02 posto ukupno ostvarenog prihoda u tom periodu“, istakao je Ramiz Karić, direktor firme „Herceg“ Srebrenik. U proteklih 10 g. niti jednom nije zabilježen pad izvoza, a



Ramiz Karić

Al i PVC prozore i vrata, fasade, ograde i ostale proizvode firme „Herceg“ u najvećoj mjeri kupuju u Belgiji, Holandiji, Švicarskoj, Austriji, Luksemburgu, Sloveniji i Norveškoj. Zahvaljujući zadovoljavanju najviših evropskih standarda kvaliteta koje kontroliše prestižni holandski Institut „SKG“, firma „Herceg“ uspješno izvozi svoje proizvode i u ostale zemlje EU, a ove godine izvezli su svoje proizvode i na tržište daleke Australije. Firma Herceg trenutno zapošljava 276 radnika, od čega je 18 s VSS i 2 s VŠS, a zahvaljujući stalnom povećanju izvoza, danas je „Herceg“ najveći proizvođač PVC i Al sistema u BiH. Također, boreći se za osvajanje tržišta EU u rukovodstvu su podjednako ulagali i u veoma brzu utakmicu tehničko - tehnološkog razvoja. Uloženo je više od sedam miliona KM za deset godina a posljednji kvartal ove godine, prema planovima, donosi početak izgradnje modernog izložbeno-prodajnog salona.

Ozvaničen početak rada novog rudnika krečnjaka u Bjelavama kod Srebrenika



Detalj sa sastanka u firmi "Jablan"

Potpisivanjem ugovora o koncesiji za eksploataciju kamena između Željka Knežićeka, ministra industrije, energetike i rudarstva u Vladi TK-a i Musić Mersudina, direktora d.o.o "Jablan" Srebrenik, krajem oktobra 2011.g., ozvaničen je početak rada novootvorenog Rudnika krečnjaka u Bjelavama kod Srebrenika. Na prigodnoj svečanosti ministar Knežiček je istakao: -Samo otvaranje novog rudnika, što je samo po sebi za slavlje,

ni nova radna mjesta nisu ovdje najbitnija. Najbitnije je da imamo zdrave ljude i sigurnu radnu snagu, jer se mašine, tehnologija i metode otkopavanja mogu zamijeniti ali se ne može zamijeniti čovjek, ukoliko strada. Sigurnost ljudi mora biti prioritet i to mora biti prva obaveza menadžmenta. -Uz primarnu eksploataciju kamena na području 10 hektara, nova investiciona ulaganja u opremu omogućiće otvaranje novih radnih mjesta. Trenutno je uposleno 15 radnika a nabavkom modernije opreme te uspostavom nove tehnologije, kada ćemo početi proizvoditi proizvode više faze prerade i u šta ćemo do marta 2012. godine uložiti od 2 do 3 miliona KM, omogućiće se zaposlenje još 15 radnika. -istakao je direktor Musić. Svečanosti potpisivanja ugovora prisustvovao je i Mehmed Bajrektarević, načelnik općine Srebrenik, koji je kazao: -Ovim činom dobili smo još jednu legalnu, kvalitetnu firmu, koja će se baviti proizvodnjom kamenih agregata i koja će zaposliti nove radnike. Za nas je ovaj čin posebno značajan obzirom da će 80 posto koncesionih naknada ići u općinski budžet, što će nam omogućiti nastavak dosadašnjih intenzivnih ulaganja u infrastrukturu.

Samiri Smajlović srebro na 9. DILSET olimpijadi turskog jezika



Detalj sa dodjele nagrade za 1. mjesto u Sarajevu

školovanja na navedenom koledžu ostvarila takođe veoma uspješne rezultate, kom prilikom je i nagrađena osmodnevnim putovanjem u Istanbul. Samira Smajlović je rođena 21.09.1994.godine u Tuzli. Osnovnu školu je završila u Drugoj osnovnoj školi u Srebreniku sa odličnim uspjehom. Živi u Čehajama, prigradskom naselju kod Srebrenika. Za vrijeme boravka u Srebreniku, trenirala je i igrala odbojku za O.K. „Gradina“ Srebrenik, a trenutno je članica školske reprezentacije u odbojci. Po završetku osnovnog obrazovanja uspješno je položila prijemni ispit, i time ostvarila pravo na stipendiju za školovanje na Tursko-Bosanskom koledžu u Sarajevu. Čestitamo Samiri na postignutom uspjehu uz želju da i u budućem radu postiže slične rezultate.

Samira Smajlović (17), učenica III razreda Tursko-Bosanskog koledža u Sarajevu, osvojila je srebrnu medalju (drugo mjesto) na 9. DILSET olimpijadi turskog jezika održanoj od 15. do 30. juna 2011 godine u Ankari, na kojoj se takmičilo 520 učenika iz 120 država. Prethodno je, u martu ove godine, na takmičenju iz turskog jezika na području Bosne i Hercegovine osvojila zlatnu medalju (prvo mjesto). DILSET olimpijadu iz turskog jezika organiziralo je Internacionalno vijeće za jezike u saradnji s turskim prestižnim sponzorima i pristalicama kao što su Turski jezički izvori, Turski historijski izvori i Ministarstvo nacionalnog obrazovanja vlade Turske, 2003. godine od kada se svake godine održava. Zamišljena da poveže ljude iz cijelog svijeta na takmičenju govornog i pisanog turskog jezika, DILSET olimpijada iz turskog jezika postala je izvanredni doprinos zajednici, ljubavi i miroljubivosti razmišljanja među državama u svijetu. Na 9. DILSET olimpijadi priređen je raznolik program. Učenici su se takmičili u nekoliko područja: poezija, pjevanje, pisanje priča, prezentacije i osnovno poznavanje turskog jezika. Po povratku u Bosnu i Hercegovinu, Samiri su osim menadžmenta škole, čestitali majka Vahida i otac Mehmedalija, koji su ponosno istakli da je ovo samo jedan u nizu Samirinih uspjeha, obzirom da je tokom prve godine



Samira Smajlović u Turskoj

Osnovci u Dubokom Potoku dobili nove školske klupe

Predstavnici nevladine organizacije "Obrazovanje gradi BiH" donirali su Osnovnoj školi "Duboki Potok" vrijednu donaciju školskog namještaja i tehničkih sredstava. Riječ je o 50 školskih klupa, 100 stolica i pet televizora, u vrijednosti od oko 2.500 eura, koji će ublažiti problem nedostatka školskog namještaja u ovoj obrazovnoj ustanovi. Donaciju školskog namještaja i tehničkih uređaja osigurala je humanitarna organizacija "Emmaus" iz francuskog grada Grenobla s kojom nevladina organizacija "Obrazovanje gradi BiH" uspješno sarađuje već desetak godina. U skoro proteklih sedamnaest godina Udruženje „Obrazovanje gradi BiH“ pomaže djeci žrtava rata u BiH 1992.-1995., invalidnoj i talentovanoj djeci da uspješno završe školovanje i postanu korisni članovi društva. Ostvarujući misiju – djeca žrtava rata – naša trajna briga, širom su otvorili vrata kuće u ulici Dobojska 4 za one kojima je potrebna moralna i materijalna podrška. Sa jednim zaposlenim i na desetine volontera dodijelili su

preko 28.000 stipendija u vrijednosti od oko 1.100.000 EUR-a i podijelili školski pribor, školski namještaj, odjeću, obuću, hranu, keramičke table, kompjutere i dr. nastavna pomagala u vrijednosti od preko 1.500.000 EUR-a.



Ilustracija

Podijeljeni poklon paketi djeci iz socijalno ugroženih porodica

Dana 03.09.2011.g., predstavnici Merhameta Njemačke, Udruženja penzionera civilnih invalida I i II kategorije i MDD Merhamet Srebrenik, na gradskom šetalištu u Srebreniku organizirali su podjelu prigodnih paketa djeci iz socijalno ugroženih porodica. Podjela je upriličena u povodu bajramskih blagdana, a ukupno je podijeljeno oko 130 đačkih torbi s neophodnim školskim priborom djeci s posebnim potrebama i mališanima iz romskih i socijalno ugroženih porodica s područja ove općine. Sredstva za kupovinu paketa donirao je Merhamet Njemačke, a nakon podjele paketa na gradskom šetalištu, predstavnici ove humanitarne organizacije posjetili su i izbjeglički kamp u Špionici kod Srebrenika, gdje su djecu iz izbjegličkih porodica obradovali s prigodnim paketima. Kako ističe Amira Biber, koordinatorica ovog projekta, u povodu bajramskih blagdana Merhamet Njemačke je u BiH podijelio ukupno 600 đačkih torba sa školskim priborom. Uz mališane u Srebreniku, paketi su podijeljeni i djeci u izbjegličkim kampovima Karaula, Ježevac i Višća, kao i djeci u povratničkim naseljima Mahala, Potočari, Srebrenica, Kamenica i Lipje. U kupovinu đačkih torbi sa školskim priborom, prema riječima Biber, Merhamet Njemačke uložio je oko 12.000 maraka. Ogranak MDD „Merhamet“ u Njemačkoj formiran je sredinom 1992. godine, odmah nakon agresije na BiH, a u protekle skoro dvije decenije aktivisti ove humanitarne organizacije distribuirali su na

hiljade paketa socijalno ugroženim porodicama u BiH. Uz prigodne prehrambene i druge pakete, socijalno ugrožene porodice u BiH pomažu i dodjelom jednokratne novčane pomoći, a u sklopu projekta „Zaboravljeni izbjeglički kampovi“ trenutno su najviše fokusirani na poboljšanje socijalnog položaja prognaničkih porodica koje borave u izbjegličkim kampovima.



Detalj sa podjele poklon paketa djeci iz socijalno ugroženih porodica

Nova kuća porodici Džanić

Adem Džanić, 44-godišnji nezaposleni demobilisani borac iz Lušnice kod Srebrenika, sa suprugom Samidom i 13-godišnjim sinom Admirom živi u trošnoj kućici koja prijeti da se svakog časa sruši. Prije četiri godine, nakon što je njegova firma otišla u stečaj, ostao je bez posla, tako da su svi raniji planovi o izgradnji nove kuće pali u vodu, jer skromna zarada od povremenih teških fizički poslova nije dovoljna ni za nabavku osnovnih namirnica i školovanje djeteta. No, zahvaljujući dobrim ljudima porodica Džanić uskoro bi trebala dobiti siguran krov nad glavom. Naime, prije tri mjeseca rukovodstvo MZ Lušnica pokrenulo je huma-



Adem i Samida Džanić


nu akciju na izgradnji nove kuće porodici Džanić koja je naišla na izuzetno dobar odziv mještana ovog naselja.



Nova kuća porodice Džanić

Kako ističe Husein Joldić, predsjednik MZ Lušnica, mještanka ovog naselja Razija Joldić besplatno je dodijelila plac porodici Džanić, a u pomoć su priskočili općina Srebrenik, Centar za socijalni rad i brojni donatori iz Lušnice, ali i ostalih srebreničkih naselja. Na doniranom placu za veoma kratko vrijeme urađeno je prizemlje i prvi sprat, a privode se kraju i radovi na postavljanju krovne konstrukcije i unutrašnjem uređenju nove kuće dimenzija 9x8 metara. U izgradnju nove kuće uloženo je oko 30.000 KM, a ako se sve bude odvijalo po planu, ističe Joldić, tročlana porodica Džanić trebala bi se do Kurban bajrama useliti u novu kuću. - Teško je opisati emocije koje čovjeka obuzmu kad u svom dorištu vidi konture nove kuće i kad se na radnim akcijama okupi i po 20 dobrih ljudi koji besplatno rade na izgradnji našeg novog doma. Zahvaljujemo se svima koji su na bilo koji način učestvovali u izgradnji naše nove kuće, jer bez njihove pomoći teško da bi došli do novog krova nad glavom, ističu supružnici Džanić.

Odlomci iz neobjavljenog romana „Omča“



Nurkanović Kemal je rođen 1950. godine u Seoni, općina Srebrenik. Penzioner je i živi sa suprugom Senkom u Srebreniku. Prvi roman „Fantazmagorije vremena“ je objavio 2010. godine u izdanju „OFF-SET“ Tuzla. Prema riječima istaknutih BiH književnika Atifa Kujundžića i Nijaza Alispahića, kao i dr. sc. Omera Hamzića u recenziji romana u 31. broju Gračaničkog glasnika, roman govori o raspadanju ljudskog bića i zlu koje je u vihoru rata zadesilo građane BiH i posjeduje zavidan nivo kvaliteta. Isti roman je 2011. godine UG „Hrast“ Gunja izdalo za hrvatsko tržište.

-Dugujem zahvalnost roditeljima što me stvorili, okolini što me trpi i vjeri što me drži u pokori - hvala im! Prepuštam se vremenu i dragome Bogu, jedino mjerodavnim da o meni sude, i djeci kada budu imala četrdeset godina i porodično iskustvo, dok želim da žene budu tolerantnije, da djeca slušaju i da neprijatelj krepe ionako ostaju misaoneističe Nurkanović.

Donosimo 3 odlomka iz neobjavljenog drugog romana „Omča“ za koji autor traži sponzora, jer je najveća šteta da knjiga koja je gotova stoji neobjavljena, a na trećem romanu uveliko radi.

Odlomak 1

Miris sedla i osjećaj nadmoći kada jaše izmami mu zadovoljan osmijeh koji traje sve do imanja, gdje se gubi jer Bećirbeg, kao gazda, mora imati strogo i dostojanstveno držanje, da bi pokornost irgata bila veća. Razgleda, obilazi, daje upute i kori, ponekad i priprijeti - otkatkom ili čime drugim. Kada se umori traži hlada - počine, smota koju i zadimi, pa ponovo viče i kori. A Ljupka navikla - sapeta pase u ograničenom prostoru, striže ušima i čeka komandu za povratak.

I konja i kobila imao je Bećirbeg, k'o sirotinja rahatluka, ali k'o Ljupku, nikada. Srednje razvijena, crna ko gavran, uhranjena, živahna i poslušna životinja, na svaki begov potez uzdom odgovara poslušno, i po njegovom čejfu, pa se dive i drugi, i zavide. A tek rahvan! Cupka u mjestu, prvo sitno a onda brže, a on, Bećirbeg, topi se k'o salo na furuni, od miline.

Popodne prispi na sedlu, u šumarku ako je na sjevernim imanjima, ili u šljiviku, ako je u južnim, gdje šumarka nema...

Odlomak 2

Život Crne udovice naglo se promijenio iznenadnim otkrićem-na njenu žalost i zaprepaštenje- saznala je da je u drugom stanju. Sva dosadašnja događanja protekla u šeretskom raspoloženju u kojima je učestvovala kao glavna zvijezda-vesela i bezbrižna mladost-gdje je uzimala šta je htjela, a drugi zdušno davali- pretvorila su se u noćnu moru. Mada je znala za "rješenje", jer je bila u fazi kada se bezbjedno po zdravlje mogla riješiti ploda, a bila u stalnoj vezi sa seoskim "ginekolozima", odluka koju je donijela bila je čvrsta i nepokolebljiva - roditi!

Jad, bijeda, neizvjesnost...bez vidljivog znaka o budućem boljitku, bili su njeni pratioci, ali nepokolebljivost sa kojom je donijela odluku nije dala mjesta dilemi- rodiće sebi sina, odgajat će ga... a za oca mu neće ni da čuje, jer je prevarom uze.

Kad joj tijelo dobi novi izgled i tuđe oko otkri promjenu na postavljena pitanja- koja su, uzgred, pljuštala- ponudi jedan odgovor: šta vas briga, JA znam.

I počne da sviće novo gnijezdo...

Odlomak 3

... Bosanac je moj otac. ON mi uli život i daje snagu da čestito živim i dostojanstveno umrem i da, iza mene, ostane nešto - možda za drugo oko nevidljivo, ili zatrovano ljubomorom ili čime drugim, i gorim, što mnogi nemaju ili su borbom istjerali neman iz svog sveobuhvatnog pousa, a po čemu će se znati da sam postojao. Ne znam.ON mi ispriča svoj život nalazeći vremena i strpljenja da moj mlađahni mozak pokupi svaku riječ i upije je kao spužva - fragmenti tih priča ostaše mi duboko urezani u sjećanje pa mi se kao izmaglica vraćahu u podsvijest, pomiješani sa mojim doživljajima.ON prenese svu ljubav koju ljudski rod rabi, a mržnju - ako ju je i imao- vješto skloni od mene i pohrani na nepoznato mjesto gdje vječno osta zakopana i nedostupna ljudskom rodu i porodu, a košmar u mojoj glavi koji se često javljaše bi proizvod drugih, onih koji nikad ne saznadoše kako bitisaše, ni kako završiše- a odoše bez ičega iza sebe.

Ta mržnja koja se u klici pojavljuje u svakoga živoga raba bi uništena voljom NJEGOVOM , a ljubav pokri prazninu i razvi se u vječnost s porukama onim koji dolaze - volite se, ljudi, budite sretni i od ljepote koja vas okružuje izaberite najbolje, a kraj dočekajte mirno i dostojanstveno, bez obzira na iskušenja kojima smo cijeli vijek izloženi...!

ON mi predade neotvoren ćup pun bogatstva i iskušenja - bogatstvo ostavih pred vratima amidžinim jedno rano jutro... i smad bogatih, a iskušenje sačuvah do kraja nedinuto - nada koja se učvrsti u mojim bolnim grudima osta do kraja koji, ipak, dođe poslednji.

NJEMU i dragoj majci rahmet duši - počivajte u miru osame daleko od ovoga ogavnoga svijeta!

Odlazi i poslednji oslonac... gubim razum... hvatam se za nešto čega nema... tonem... idem u beskonačnost, i više me nema...

Ekipi „MIX“ zlato na Sportskim igrama mladih u Splitu



Nerma i Dunja sa roditeljima

Ženska ekipa u odbojci na pijesku „MIX“ sastavljena od Mujkanović Nerme iz Srebrenika i Drinić Dunje iz Modriče, u konkurenciji najboljih ekipa iz sedam država, na završnici Sportskih igara mladih u Splitu, je osvojila prvo mjesto.

Naime ove godine su, u deset većih gradova u BiH, održane Sportske igre mladih za djecu do 15 godina u 10 sportova. Naša općina je imala predstavnika u odbojci na pijesku za djevojčice. Ova multinacionalna ekipa je nastupila na takmičenju u Tuzli i u konkurenciji 8 ekipa, bez izgubljenog seta, je osvojila 1. mjesto. U Sarajevu je održana završnica Sportskih igara mladih za BiH, na kojima su nastupile najbolje ekipe iz 10 gradova, a naša ekipa je ponovila uspjeh iz Tuzle, osvojivši 1. mjesto, takođe bez izgubljenog seta. U Splitu, R. Hrvatska, od 22. do 26.08.2011. godine održana je završnica Sportskih igara mladih za region, gdje su učešće uzele najbolje ekipe iz BiH, Hrvatske, Estonije, Mađarske, Makedonije, Slovenije i Crne Gore. I na navedenom takmičenju naša mlada ekipa je, bez izgubljenog seta, ubjedljivo osvojila 1. mjesto dobivši za to pobjednički pehar i zlatne medalje. Vođa i trener ove ekipe je Mujkanović Nermin, prof. tjelesnog i zdravstvenog odgoja iz Srebrenika, koji je trenutno trener muške odbojkaške ekipe „Gradina“ Srebrenik i otac Nerme. –„Ovaj miks se pokazao veoma uspješnim. To je dokaz da mi imamo kvalitet, samo treba društvena zajednica uložiti više truda u obezbjeđenje prostora i kvalitetnih uslova za obavljanje treninga i rezultati će sigurno doći. Ja i Dunjin otac Nebojša, smo uložili puno truda i sopstvenih novčanih sredstava da bi ove nadarene sportašice postigle navedene uspjehe, a jedino smo od našeg Sportskog saveza dobili 100 KM pomoći za odlazak na takmičenje u Split.“-ističe Mujkanović Nermin. Inače Nerma trenutno ide u prvi razred Gimnazije u Srebreniku i igra u seniorskom sastavu OK Gradina Srebrenik, juniorska je i kadetska reprezentativka BiH, a Dunja je u seniorskom sastavu ekipe Modriče. Čestitamo Nermi, Dunji i njihovim roditeljima na postignutom uspjehu uz želju da tako nastave i u budućnosti.

Velemajstor Danilo Milanović pobjednik 7. međunarodnog šahovskog turnira Džafer Hogić

U organizaciji ŠK „Srebrenik“, u ljetnoj bašti motela Gradina u Srebreniku, održan je Sedmi međunarodni memorijalni šahovski turnir „Džafer Hogić“, posvećen velikom srebreničkom privredniku i ljubitelju drevne igre. Nastupilo je čak 114 šahista iz BiH, Srbije, Hrvatske, Crne Gore i Švicarske, a među njima je bilo 7 velemajestora, 7 internacionalnih majstora i 7 majstora FIDE. Igralo se devet kola po švicarskom sistemu uz tempo igre od 14 minuta po igraču, uz primjenu pravila za brzopotezni šah, a najuspješniji je bio velemajestor Danilo Milanović iz Srbije. Nagradni fond iznosio je 1.700 maraka, a raspoređen je na 10 redovnih i sedam specijalnih nagra-



Danilo Milanović

nagrada. Pobjedniku turnira pripala je nagrada u iznosu od 400 maraka. Konačni poredak: Milanović 7,5, Dizdarević, Rogić, Jovanović, Nurkić, Runić, Vukić i Stojanović 7, Stević, Leventić i Iveljić 6,5. u kategoriji "U-21". Pored osvajača medalja za karate klub "Srebrenik" je nastupilo još 3 takmičara, a to su: Salihbašić Arnela, Filipović Josip i Jašarević Amir, koji nažalost ovaj put nisu uspjeli doći do medalje. Čestitke klubu i osvajačima medalja, a ostalima želimo više sreće na narednim prvenstvima.



Detalj sa turnira

Safet Suljić iz Srebrenika ulovio amura od 20 kilograma



Safet Suljić sa amurom od 20 kg

Dugogodišnji ribolovac Safet Suljić iz Srebrenika, dana 12.08.2011.g. u ranim jutarnjim satima, ulovio je amura teškog 20 kg. Iako je 49.godišnji Safet iskusan ribolovac i do sada je imao ulove šarana od 16 kg i smuđa od po 10 kg, kaže da mu je ulov kapitalnog primjerka amura najveći do sada. –Pecao sam cijelu noć. Za krmu i mamac sam upotrijebio kukuruz i oko 7 sati ujutro osjetio sam snažan trzaj, tako da sam znao da se radi o velikom ulovu. Borba je trajala oko 15 minuta, a iako sam bio sam i koristio relativno jeftin ali dobro pripremljen ribolovački pribor, uspješno sam uspio izvući amura-istakao je Safet. Amur, kao uostalom i svi njegovi veći ulovi do sada, je upecan u Gradačcu, na jezeru Vida-rejon Lipici. Kaže da mu je ribolov najstrastveniji hobi i da se njime bavi od malih nogu.

Završen Streetball 2011



Detalj sa turnira

Na turniru „Streetball 2011“ koji je održan 22.08.2011.g. u Srebreniku, učesće je uzelo 17 ekipa sa područja TK-a, Semberije, Brčko DC i Posavine. Nakon revijalnih utakmica minibasketaša Silver Kingsa, počeo je turnir u kategoriji pionira gdje je prvo mjesto zauzela ekipa Slobode. Odigrana je i revijalna utakmica pionirki ekipa Silver Queens i Brčko DC. Utakmica je završena neriješenim rezultatom i nakon slobodnih bacanja pobjedu nose „Kraljice“ koje su debitirale na ovom turniru. U kadetskoj konkurenciji najbolja je ekipa Budućnosti iz Bijeljine, koji su osvojili nagradu u vidu košarkaških NBA kompleta. Oko 21 sat krenulo je do sada najmasovnije takmičenje u šutiranju trojki. Prijavljeno je bilo čak 37 takmičara a nakon prvog kruga se vidjelo da su najozbiljniji kandidati za finale bili Buljubašić (KK Gradina Srebrenik) i Čojić (KK Budućnost Bijeljina) koji su pogodili u prvom krugu po 10 trojki od mogućih 15. U finalu prvi je nastupio Buljubašić koji je pogodio 7 trojki a iza njega Dario Čojić sa 8 pogodaka osvaja prvo mjesto i novčanu nagradu od 200 KM dok je drugoplasiranim pripala nagrada od 50 KM. Čestitamo organizatorima turnira na uspješnoj organizaciji i nadamo se još boljim vijestima naredne godine.

Košarkaši Gradine pred novu sezonu u A1 ligi

Košarkaši Gradine iz Srebrenika uveliko se pripremaju za novu sezonu u A1 ligi. Početak priprema novinarima u „Sportsko-rekreativnom centru“ u Srebreniku najavio je predsjednik Mursel Delić, koji je predstavio novog trenera Vladimira Mićanovića te dvojicu pojačanja iz Brčko-Distrikta, Damira Đonlića i Alena Horozića. –Mislim da smo s novim trenerom i pojačanjima „pogodili“ i da ćemo uz postojeći igrački kadar u novoj sezoni biti znatno jači. Svi igrači će potpisati ugovore kao i Upravni odbor, kako bi se obavezali da će biti vjerni ovome Klubu, koji sa amaterskog rada prelazi na poluprofesionalni nivo rada, kazao je Delić. Sportski direktor Adnan Mujkić istakao je da će igrači na raspolaganju imati sve uslove za rad, a novi „coach“ Mićanović očekuje profesionalan odnos prema radu nakon čega rezultat sigurno neće izostati. Prvenstvo će najvjerovatnije početi do izlaska ovog biltena iz štampe, kada ćemo imati priliku da se uvjerimo u tačnost navedenog.



Detalj sa press konferencije